

“Il temps varga...”

... aschia tuna ei adina puspei, sch'in temps special va a fin, ni tier ina caschun d'in natalezi ni tier in auter eveniment. Ei dat mintgaton il sentiment ch'il temps va inagada pli spert, in outra gada para ei ch'el mondi buca sperasvi.

Aschia eis ei era cun igl onn da scola. Damai che la fiasta da Pastgas ei stada uonn schi tard, ein era las grondas fiastas dil temps da Pastgas curdadas ellas davosas jamnas da scola. Pia san ins haver il sentiment, ch'igl onn da scola 2010/11 ei ius a fin fetg spert.

“**Il temps varga** mai schi spert sco duront las vacanzas!” Forsa haveis vus era gia fatg quellas experientschas. Mo uonn hai jeu buca schi bia peda da far mias vacanzas. Las lavurs vid la Casa pervenda van plaunsiu alla fin e quei vul dir: Puspei midar la casa, la habitaziun sco era il biro. Ord quei motiv havein nus era priu duas ediziuns dil Fegl parochial ensemen, sco vus haveis il tal ussa enta maun.

Ch'**il temps varga**, quei vesel jeu era tier ils affons: Quels ch'jeu hai battegiu sco pops van gia a scola. Gie, endisch onns sundel gia cheu a Laax ed a Falera e diesch onns sco augsegner. Quei ei mo in giubileum fetg pign, sch'jeu legel ellas gasettas dils giubilar, che san festivar in giubileum da plirs decennis.

“**Il temps varga**” era tier miu cuors obligatoric da quater jamnas, ch'jeu hai da frequentar suenter diesch onns sco augsegner. E quei cuors interdiocesan ha liug ils 8 d'uost tochen ils 2 da settember 2011. L'emprema jamna dat ei exerchezis spirituals a Quarten. La secunda tochen la quarta jamna ei temps da lavur el seminari St. Beat a Lucerna.

“Per **il temps che varga**” spert ni plaunsiu, giavischel a Vus tuts bialas ed emperneivlas experientschas.

Vies sur Peter

Informaziuns per Laax

FENADUR:

Communiun dils malsauns:

Mesjamna, ils 13-07-2011 suentermiezdi

Portas aviartas

La nova Casa pervenda arva sias portas per prender investa dallas localitads: Sonda, ils 16 da fenadur 2011 naven dallas 10.00h tochen las 12.00h. Tuts parochians ein cordialmein envidai leutier. L'inauguraziun e benedicziun ha lu liug dumengia, ils 14 d'uost suenter messa.

Naven dils 18 da zercladur 2011 sesanfla il biro digl uffeci parochial puspei en Casa pervenda.

Cordial invit alla Messa alpestra a Nagens

Dumengia, ils 17 da fenadur 2011 ha liug l'usitada messa alpestra. Il survetsch divin entscheiva allas 11.15h e vegn embellius cun canzuns dil Chor mischedau. La pusseivladad da carrar a Nagens ei dada entras il bus.

En cass da maccort'aura dat la nr. da telefon 079/ 283 45 80 sclariment dallas 07.00h tochen las 09.00h. Da maccort'aura ei la messa allas 10.15h en baselgia parochiala. Ulteriurs detagls suondan el Fegl uffical.

Nus envidein Vus tuts cordialmein a quella sentupada cun Diu sut tschiel aviert e giavischein ina sulegliva e legrevla dumengia en buna cumpignia.

Quella messa alpestra vegn filmada. Duess l'aura buca lubir da celebrar la messa quei di, lu vegn la messa alpestra spustada sin dumengia ils 31 da fenadur 2011.

Survetsch divin ecumen internaziunal dil SOW 2011

„D'anflar orientaziun, buc piarder la direcziun” cun quei tema preparan participonts internaziunals dil SOW 2011 in survetsch divin ecumen en nossa baselgia parochiala. Era indigens ein cordialmein beinvegni per ils 31 da fenadur 2011 allas 17.00h.

Informaziuns per Laax

UOST:

Cordial invit per l'inauguraziun dalla nova Casa pervenda

Dumengia, ils 14 d'ost 2011, suenter messa, ha liug l'inauguraziun e benedicziun dalla nova Casa pervenda.

Da Nossadunna d'ost avon in onn havein nus priu cumiau dall'antieriura Casa pervenda. Uonn havein nus plascher da far a vus tuts in cordial beinvegni a l'inauguraziun dalla nova casa.

Nus implorein la benedicziun dil bien Diu per tuts quels che passan sur la sava da quella casa e per tut quels che s'engaschan sin ina moda ni l'autra per il beinstar da nossa pleiv e da nossa cuminonza. In sincer Dieus paghi a tuts mistergners che han prestau gronda lavur duront quei temps. Lur prestaziuns ein veseivlas e demuossan lur cumpetenzza sils differents secturs.

Suenter igl act sacral dat ei era in "viva" per la nova casa cun in aperitiv.

Gratulaziun per nozzas

Sonda, ils 13 d'ost 2011 festiveschan *Andrea Camathias e Valentin Schmed* lur nozzas a Surrein. Cordiala gratulaziun, bia ventira, cletg e la protecziun dil bien Diu en Vossa veta matrimoniala.

Gratulaziun per natalezi

Ils 25 d'ost 2011 astga *Hans König* festivar siu 90-avel natalezi. Nus gratulein cordialmein e giavischein tut il bien, buna sanadad ed in legreivel e sulegliv di da fiasta.

Absenza da Sur Peter

Duront mi'absenza pervia dil cuors vegnan las messas reducidas. Per l'inauguraziun dalla nova casa pervenda a Laax vegnel anavos, schiglioc vegnan agids pastorals a surprender las s. messas.

Jeu engraziel era alla grupp da liturgia ed al cussegl pastoral che fan ina dumengia in survetsch divin dil plaid. Era per l'entschatta digl onn da scola vegn celebrau per excepziun en omisduas pleivs survetschs divins ecumens, preparai dallas catechetas cun sur Alexander Nan (augsegner orthodox). Era a quella grupp engraziel fetg; che quels survetschs divins gartegien era senza mei.

Informaziuns per Falera

FENADUR:

Communiun dils malsauns:

Venderdis, ils 01-07-2011 suentermiezdi
Gievgia, ils 14-07-2011 suentermiezdi

Gratulaziun per nozzas

Nus gratulein cordialmein als nozzadurs e giavischein bia cletg, ventira e la protecziun da Diu en Vossa veta matrimoniala:

Ils 09 da fenadur 2011 a Carmen Peter e Remo Camathias
ils 16 da fenadur 2011 a Pasqualina De Luca e Gianni Pedretti
ils 30 da fenadur 2011 a Barbara Lang e Daniel Lutz.

Fiasta dil sogn Batten

Sonda, ils 23 da fenadur 2011 retscheiva *Moira*, feglia da Tamara Gämperle e Rolf Grob e dumengia, ils 31 da fenadur 2011, retscheiva *Aita*, feglia da Thomas e Gina Näf-Darms il sogn sacrament dil Batten. Allas duas novas commembras da nossa Baselgia fagein in cordial beinvegni. Nus giavischein ad ellas e lur famiglias la benedicziun da Diu ed il sustegn dalla cuminonza cristiana.

UOST:

Communiun dils malsauns:

Venderdis, ils 05-08-2011 suentermiezdi
Gievgia, ils 18-08-2011 suentermiezdi

Gratulaziun per nozzas

Nus gratulein cordialmein als nozzadurs e giavischein in di sulegliv da fiasta, bia cletg, ventira e la protecziun da Diu en Vossa veta matrimoniala.

Ils 20 d'ost 2011 a Claudia Candinas e Roman Bebi,
ils 27 d'ost 2011 a Muriel Tarnutzer e Michael Köppel.